

Cup Crestas 2018

Mudesta participaziun – ed ina prestaziun extraordinaria

Dacuort ha giu liug il tradiziunal turnier Cup Crestas dil club da tennis Trun ellas categorias: umens R5 – R9, umens R7 – R9 e dubel/mix R1 – R9. Cun total 11 participonts ellas categorias R5 –R9 / R7 –R9 e 5 equipas tiel dubel/mix ei la participaziun stada aschi mudesta sco aunc mai e bunamein la mesadad dil participonts ha il Club da tennis da Danis – Tavanasa tschentau. Ils motivs pon esser differents: Il termin croda gest alla entschatta dallas vacanzas, a Zezras ha liug il medem temps ina occurrenza pli u meins cullas medemas categorias ed en general constateschan ins in digren dalla participaziun als turniers. Fertion che l'aura haveva impediù igl onn vargau da terminar duas categoarias ei quei uonn buca stau il cass – anzi, igl ei stau la calira che ha fatg empau fastedis a jugadurs e jugaduras.

Categoria umens singul R5 – R9, prestaziun extraordinaria da Valentin Pally

En quella categoaria ha ei dau dirs e liungs cumbats sin in fetg ault nivel ed ella persuna da Christian Götz da Cuera in meritau victur. Per la pli gronda prestaziun procura denton Valentin Pally da Curaglia, che dat interclub ella equipa dils seniors a Mustér. Valentin Pally (annada 1964) piarda entras ina collisiun cun ina maschina da pista ella vegliadetgna da 24 onns il bratsch dretg. Secapescha che quei munta ina greva cesura ella veta d'in giuven da 24 onns. E tier in ch'ei dretger, sco il Valentin, che sto emprender da saver far las impurtontas funcziuns ussa cul maun e bratsch seniester, san ins mo s'imaginar tgei energia e perseveronza ch'ei ha duvrau per puspei saver s'integrar en in process da lavur e da dumignar la veta da mintgadi. Valentin che ha suenter igl accident buca saviu exequir pli sia lavur sco electricist ei sescolaus entuorn cun success e meina dapi plirs onns la canzlia dalla vischnaunca da Medel. Cul temps ei Valentin sededicaus al sport da tennis. Era cheu ha ei giu num, midar tut vi silla vart seniastra: Prender sil il bal, dar il servis e quei tut mo cun in bratsch. Per saver far quei drova ei veramein habilitads artisticas. Cul temps ha Valentin Pally fatg part dalla equipa d'interclub da Mustér ed era entschiet a dar turniers, e quei cun success cumplein. Oz eis el classaus sco R6 e tgi che capescha empau da dar tennis sa tgei prestaziun ch'ei drova per quella rangaziun. Tier il turnier a Trun ha Valentin Pally puspei mussau prestaziuns excellentas che meretan nies respect. Ed era sch'ei ha buca tunschiu pigl emprem rang eis el tuttina in victur. In victur sur da sesez ch'ei per nus tuts in bien exempel co ins surmuntar in grev handicap ella veta.

Rangaziun

1.Christian Götz R6, 2. Claudio Friberg R5, 3. Linus Tschalèr, R5, 4. Valentin Pally R6, 5. Marc Janett R6

Categoria umens singul R7 – R9

En quella categoria ei vegniu giugau en duas gruppas ed ils victurs dalla gruppa, Andrej Maissen da Tavanasa e Stephan Vetsch da Pizol, han dau il final. Quel ei lu ius claramain cun il resultat da 6:0/6:1 en favur da Vetsch.

Rangaziun

1.Stephan Vetsch, 2. Andrej Maissen, 3. Anton Schmid, 4. Dominic Maissen, 5. Manuel Cabernard, 5. Ramun Venzin

Categoria dubel/mix

Quella categoria dominescha il ferm duo dil Club da Tennis Trun: Simon Lechmann cun Sereina Decurtins gudognan meritadamein avon Erich Decurtins e Karin Demont.

Rangaziun

1.Simon Lechmann/Sereina Decurtins, 2. Erich Decurtins/Karin Demont, 3. Retus Cathomas/Claudia Cathomas, 4. Gion Petschen/Aurelia Petschen, 5. Anton Schmid/Valeria Schmid



Valentin Pally: il protagonist che demuossa malgrad ina amputaziun dil bratsch dretg prestaziuns excellentas sil plaz da tennis.



*Ils finalists R7 – R9
Dretg il victur Stephan Vetsch, Pizol,
seniester il secud Andrej Maissen, Tavanasa*



*Christian Götz, Cuera: il victur dil tableau R5
– R9*